



19

Niining Leksyona Matun-an Mo Kini

Si Jesus Gihukman Nga Patyon

Si Jesus Gilansang Didto Sa Krus

Ang **kamatayon** Ni Jesus

Gidughang Ang Kilid Ni Jesus

Ang Paglubong Ni Jesus

SI JESUS GIHUKMAN NGA IPATYON (Basaha ang Juan 18:39, 40:19:1-16)

Buot buhian ni Pilato si Jesus apan nahadlok siya sa mga tawo. Ilang gihul-ga si Pilato nga isumbong sa emperador sa Roma kon dili siya mouyon sa mga katawhan. Dili buot si Pilato nga mohukom sa usa ka tawo nga walay sala, apan ang iyang kaayohan labaw pang importante alang kaniya kay sa pagbuhat ug maayo. Busa si Pilato misugot na lang nga ilansang si Jesus sa krus ingon nga usa ka kriminal.

Sama kang Pilato, ang tanang katawhan nga nakadungog sa Maayong Balita mahitungod kang Jesus kinahanglan nga magapili kon unsay iyang pagabuhaton kang Jesus. Ang uban mahadlok nga modawat kang Jesus ingon nga Manluluwas tungod sa isulti o pagabuhaton sa ubang tawo kanila. Ang pagabuhaton sa Dios kanato sa adlaw sa paghukom nagaagad kon unsay atong gibuhat sa iyang Anak nga si Jesu-Cristo.

Buhata Kini

1. Nganong wala man buhii ni Pilato si Jesus?

- . . . a) Nakaplagan Niyang sad-an si Jesus.
- . . . b) Nahadlok siya sa mga tawo.
- . . . c) Buot Niyang buhian si Barrabas.

SI JESUS GILANSANG DIDTO SA KRUS

Basaha ang Juan 19:16-27

Si Jesus gilansang didto sa krus taliwala sa duha ka mga kriminal. Dihay gisulat sa ibabaw sa krus nga nag-ingon, “Si Jesus nga taga-Nasaret, ang Hari sa mga Judio.” Ang mga punoan sa kaparian dili buot sa maong pagkapulong, apan dili buot ni Pilato nga ilisan ang maong mga pulong.

Bisan pa ug diha na sa pag-antus si Jesus didto sa krus, wala Siya magahunahuna sa Iyang kaugalingon kondili sa uban. Gitugyan Niya kang Juan ang pag-atiman sa Iyang inahan. Gikan sa ubang sinulat nga mga ebanghelyo atong mabasa nga miampo si Jesus ngadto sa Dios nga pasaylooon unta kadtong mga nanaglansang Kaniya didto sa krus.

Buhata Kini

2. Unsa man ang mga pulong nga gipasulat ni Pilato sa ibabaw sa krus ni Jesus?

- . . . a) Si Jesus nga taga-Nasaret nga kriminal.
- . . . b) Si Jesus nga taga-Nasaret nga nakasupak sa kasugoan ni Moises.
- . . . c) Si Jesus nga taga-Nasaret, ang Hari sa mga Judio.

ANG KAMATAYON NI JESUS

(Basaha ang Juan 19:28-30)

Ang tanang mga panagna sa Daang Tugon mahitungod sa kamatayon sa Mesias alang sa atong mga sala nangatuman sa dihang namatay si Jesus didto sa krus. Kining tanan nangahitabo sumala sa gipanagna sa mga propeta nga may ginatusang mga tuig nga nag-una, bisan pa ang mga sundalo nga nagsugal alang sa Iyang mga saput ug ang paghatag Kaniya ug suka aron Iyang pagaimnon.

Salmo 69:21. Ug sa akong kauhaw gihatagan ako nila ug suka nga paga-imnon.

Si Jesus miingon: "Tapus na!" Iyang gip sabot nga natapos na Niya ang buluhaton nga Iyang pagabuhaton. Sa dihang namatay Siya, Iyang gibayran ang atong kaluwasan.

Tungod sa atong mga sala, si Jesus namatay. Busa dili kita makapasangil sa mga tawo sa nasud ni Jesus, o kang Pilato, o sa mga sundalo nga naglansang Kaniya. Ang sala, ang atong mga sala maoy naghatod Kaniya ngadto sa krus aron sa pagluwas kanato. Sa atong pagkahibalo niini, makapahimo kanato sa pagpakasubo alang sa atong mga sala. Dili na kita buot mopadayon sa pagbuhat sa mga butang nga maoy hinungdan sa kamatayon ni Jesus. Busa mangayo ta ug kapasayloanan sa atong mga sala ngadto sa Dios. Ato lamang dawaton ang gihimo ni Jesus kanato ug kita mamaluwas. Nagpakamatay Siya alang kanato.

1 Pedro 2:24. Siya gayud mao ang midala sa atong mga sala diha sa iyang lawas ngadto sa kahoy, aron kita mamatay ngadto sa sala ug mabuhi ngadto sa pagkamatarung.

Buhata Kini

3. Unsa may gipasabot ni Jesus sa Iyang pag-ingon nga "Tapus na."
 - . . . a) Tapus na ang vino.
 - . . . b) Ang kaluwasan natapus na.
 - . . . c) Ang tanang paglaum sa Iyang gingharian natapus na.
4. Kinsa ang **angay** pasangingan sa kamatayon ni Jesus?
 - . . . a) Kadto rang mga pangulo sa kaparian.
 - . . . b) Ang Sanhedrin, si Pilato, ug ang mga sundalo nga naglansang Kaniya.
 - . . . c) Kita ug ang tanang adunay sala. Ang atong mga sala mao ang hinungdan sa Iyang pagpakamatay.
5. Unsa may atong buhaton karon?
 - . . . a) Dili kita mokiha ni bisan kinsa ngadto sa hukmanan
 - . . . b) Kinahanglan basulon ta ang mga tawo nga nagpatay kang Jesus ug dumtan ang ilang **kaliwat**.
 - . . . c) Kinahanglan maguol kita tungod sa atong mga sala ug mangayo ug pasaylo sa Dios.

GIDUGHANG ANG KILID NI JESUS (Basaha ang Juan 19:31-37)

Ang paglansang sa krus maoy usa ka inanay nga paagi sa pagsilot sa kamatayon. Bali-on sa mga sundalo ang mga tiil sa sinilotan aron daling mamatay. Apan nakaplagaan nila si Jesus nga patay na busa wala nila bali-a ang Iyang mga bukog. Kini katumanan sa panagna.

Ang dugo ug ang tubig nga mibuhagay gikan sa kilid ni Jesus nagapasabot nga Siya namatay nga may **dakung** kaguol, nagapas-an sa silot sa tanan natong kasal-anan. Kini usab katumanan sa panagna, nga usa ka tuburan maga-awas aron paghugas sa sala.


Zacarias 13:1. Niadtong adlaw adunay usa ka tuburan nga pagabuksan alang sa balay ni David ug sa mga pumulopyo sa Jerusalem, alang sa sala ug alang sa kahugaw.

1 Juan 1:7 Ug ang dugo ni Jesus nga iyang anak nagahinlo kanato gikan sa tanang sala

Buhata Kini

6. Sag-uloha ang I Juan 1:7.

7 Basaha ang Zacarias 13:1 sa makatulo.

ANG PAGLUBONG NI JESUS**(Basaha ang Juan 19:38-42)**

Si Jose nga taga-Arimatea ug si Nicodemo maoy duha sa mga inila nga mga pangulo sa relihiyon ug nasakop sa Sanhedrin. Wala sila mopil sa paghatag kang Jesus ug hukom sa kamatayon. Hangtud niining tungora sila mga magtotoo kang Jesus sa tago lamang, ug nahadlok nga magpaila nga sila dapig kang Jesus.

Usahay lisod kaayo alang sa usa ka tawo nga anaa sa dakung katungdanan nga magpaila nga sila alang kang Jesus. Mobati sila ug kaulaw nga mosimba sa usa ka simbahan nga kasagaran sa tawong manimba mga kabus. Nahadlok tingali sila nga **papahawaon** gikan sa ilang katungdanan kon mag-Cristohanon sila. Apan ang Dios naghatag ug kaisug kang Jose ug kang Nicodemo sa pagpangayo sa patayng lawas ni Jesus aron ilang ilubong. Kini nagapakita sa ilang pagtahud ug gugma alang Kaniya. Kini nagatuman na usab sa laing panagna nga ang Mesias sa Iyang kamatayon igalubong sa lubnganan sa usa ka datu.

Ang batasan nila sa unang panahon mao nga puston nila ang minatay sa lino nga panapton ug butangan sa pahumot ug dayon ibutang sa lubnganan. Gikan sa laing sinulat nga ebanghelyo atong masayran nga ang patayng lawas ni Jesus gilubong sa lubnganan ni Jose nga taga-Arimatea.

Wala mahuman ang ilang pagpangandam alang sa paglubong tungod kay hapit na ang kagabhion sa dihang namatay si Jesus. Ug ang Sabado sa Judio magasugod sa pagsalop sa adlaw. Busa wala nila matapus ang tanang gikinahanglan alang sa paglubong ni Jesus.

Buhata Kini

8. Unsa may gibuhat nila sa lawas ni Jesus?
 - . . . a) Gilubong ni Jose ug ni Nicodemo.
 - . . . b) Gilubong sa mga tinun-an
 - . . . c) Gibiyaan nga nagbitay didto sa krus.
9. Nganong wala man matapus ang mga gikinahanglan alang sa paglubong?
 - . . . a) Tungod kay nangahadlok ang mga tinun-an ni Jesus.
 - . . . b) Tungod kay namatay si Jesus sa Sabado nga hapit na mosalop ang adlaw ug balaod nila nga kon mosalop na ang adlaw wala nay magatrabaho.
 - . . . c) Walay kwarta ang mga tinun-an nga ikapalit sa mga gikinahanglan sa paglubong.
10. Pag-ampo nga ang Dios magahatag ug kasug niadtong mga nagatoo sa tago lamang aron sila magapakita sa ilang pagka-Cristohanon.
11. Itandi ang imong tubag sa mga tubag nga anaa sa katapusan niining leksyona.
12. Sulati ang imong rekord sa estudyante alang sa ika-19 nga leksyon.

Mga Tubag sa Ika-19 nga leksyon

Kon aduna kay 6 o 7 ka hustong tubag markahi ug labing maayo; kon 5, markahi ug maayo; kon 4 kasarangan. Kon kubos sa 4 ang imong hustong tubag basaha pag-usab kining leksyona.

1. b) Nahadlok Siya sa mga tawo.
2. c) Si Jesus nga taga-Nasaret, ang Hari sa mga Judio.
3. b) Ang kaluwasan natapus na.
4. c) Kita ug sa tanang adunay sala. Ang atong mga sala mao ang hinungdan sa Iyang Pagkamatay.
5. c) Kinahanglan maguol kita sa atong mga sala ug mangayog pasaylo sa Dios.
8. a) Gilubong ni Jose ug Nicodemo.
9. b) Tungod kay namatay man si Jesus sa Sabado nga hapit na mosalop ang adlaw ug balaod nila nga kon mosalop na ang adlaw wala nay magatrabaho.

Gidaghanon sa Hustong Mga Tubag _____

Grado _____